

Clà Riatsch – nov professor da rumantsch a Turitg

DA MARTIN CABALZAR

■ **La professura da lingua e cultura rumantscha a l'università da Turitg è suenter lunga vacanza puspè occupada. Clà Riatsch e vegnì tschernì sco professor extra-ordinari.**

Oriundamain era la professura per linguatg e cultura rumantscha integrada en la Scola politecnica, da nov furma ella ina part da la facultad filosofica da l'università da Turitg nua ch'ella tutga era facticamain. Dapi la demissiun da professor *Iso Camartin* il settember 1997 è la professura stada vacanta. *Clà Riatsch* vegn a surprender la nova professura l'avrigl 2001. Sco la Lia rumantscha ha comunità è ella satisfatga che la professura vacanta ha finalmain pudì vegnir occupada.

Il nov professor

Il nov professor extra-ordinari Clà Riatsch (42) e naschì a Ramosch en Engiadina Bassa. Suenter avair absolvì la scola chantunala a Cuira ha Clà Riatsch studegià romanistica a l'università da Berna concludend ses studis cun ina disertaziun davart la litteratura taliana. L'onn 1997 ha Clà Riatsch inoltrà sia abilitaziun davart la plurilinguitad e la maschaida da linguatg en la litteratura retorumscha contemporana. Dapi blers onns instruescha Clà Riatsch sco docent ospitant talian a l'università da Berna e parzialmain a Neuchâtel. Plinavant è

Clà Riatsch vegnì incumbensà cun prelecziuns rumantschas a las universitads da Friburg e Turitg. Clà Riatsch e vegnì conuscent e renumà sco spezialist per varietads linguisticas en la litteratura. El è apparentamain stà il sulet aspirant valabel per quist post.

Nova spierta a Turitg

A partir dal semester da stad 2001 han studentas e students puspè la pussaivladad dad absolver e terminar a Turitg in studi academic cun rumantsch sco rom principal. La professura extra-ordinaria da Clà Riatsch è dotata cun in pensum la lavur da 50 pertschient. Quel cumpiglia trais uras prelecziuns u seminaris per emna. Plinavant cumpiglia la professura in assistent superiur (cun doctorat) u in assistent secundar. Fin uss ha *Mevina Puorger* ademplì quest pensum. Il professor ha plinavant er la pussaivladad da surdar singulas prelecziuns ad in incumbensà.

Litteratura e sociolinguistica

Sco quai che Clà Riatsch ha sincerà vers La Quotidiana vegn el a sa fatschentar cun la litteratura che stettia naturalmain en stretga correlaziun cun la linguistica. Riatsch na vul dentant betg far quai ord in'optica purmain istorica ed etimologica, mabain resguardar cunzunt las varietads da linguatg dal rumantsch actual applitg en la litteratura contem-

porana, dentant er en ils meds da massa. En quist connex duai la sociolinguistica obtegnair dapli spazi en il studi da rumantsch a l'università. Cun questa nova direcziun spera Riatsch era da pudair dar novs impuls al linguatg schurnalistic e porscher ina solida scolaziun per futurs redactors rumantschs. Riatsch punctuescha dentant ch'el saja flexibel avunda per s'adattar als basegns specifics da ses students.

Collavuraziun tranter las universitads?

Sin damonda da La Quotidiana schebain ina stretga collavuraziun tranter ils singuls professers da rumantsch a las singulas universitads na fissi betg opportuna en vista al pitschen dumber da studentas e students, manaja Clà Riatsch che «la voluntad persunala affirmia in tala collavuraziun, las realitads structuralas impedeschien dentant ina stretga collavuraziun». Cunquai che professor *Georges Darms* che docescha a Friburg è er en il medem mument correctur da l'università mantga il temp per barats da prelecziuns cun Turitg. Clà Riatsch na vul dentant betg perder ord egls talas cooperaziuns per l'avegnir. Era las pussaivladads da collavuraziun tranter las differentas facultads vegn examinada. Riatsch spera da tuttina chattar intgins students rumantschs a Turitg, uss che la professura saja garantida ed occupada.



Clà Riatsch – il nov professor per lingua e cultura rumantscha a l'università da Turitg.